

四庫全書

史部

欽定四庫全書

遼史卷一百五

元中書右丞相總裁托克托等修

列傳第三十五

能吏

漢以璽書賜二千石唐疏刺史縣令于屏以示獎率故
二史有循吏良吏之傳遼自太祖創業太宗撫有燕蘭
任賢使能之道亦略備矣然惟朝廷參置國官吏州縣

者多遵唐制歷世既久選舉益嚴時又分遣重臣巡行
境內察賢否而進退之是以治民理財決獄弭盜各有
其人考其德政雖未足以與諸循良之列抑亦可謂能
吏矣作能吏傳

大公鼎渤海人先世籍遼陽率賓縣統和間徙遼東豪
右以實中京因家于大定曾祖忠禮賓使父信興中主
簿公鼎幼莊愿長而好學咸雍十年登進士第調瀋州
觀察判官時遼東雨水傷稼北樞密院大發瀕河丁壯

以完隄防有司承令峻急公鼎獨曰邊障甫寧大興役
事非利國便農之道乃疏奏其事朝廷從之罷役水亦
不為災瀕河千里人莫不悅改良鄉令省徭役務農桑
建孔子廟學部民服化累遷興國軍節度副使時有隸
鷹坊者以羅畢為名擾害田里歲久民不堪公鼎言于
上即命禁戢會公鼎造朝大臣諭上嘉納之意公鼎曰
一郡獲安誠為大幸他郡如此者衆願均其賜于天下
從之徙長春州錢帛都提點車駕如春水貴主例為假

貸公鼎曰豈可輟官用徇人情拒之頗聞怨詈語曰此
吾職不敢廢也俄拜大理卿多所平反天祚即位歷長
寧軍節度使南京副留守改東京戶部使時盜殺留守
蕭保先始利其財因而倡亂民亦互生猜忌家自為鬪
公鼎單騎行郡陳以禍福衆皆投兵而拜曰是不欺我
敢弗聽命安輯如故拜中京留守賜貞亮功臣乘傳赴
官時盜賊充斥有遇公鼎于路者即叩馬乞自新公鼎
給以符約俾還業開者接踵而至不旬日境內清肅天

祚聞之加賜保節功臣時人心反側公鼎慮生變請布
恩惠以安之為之肆赦公鼎累表乞歸不許會奴賊張
薩巴率無賴嘯聚公鼎欲擊而勢有不能嘆曰吾欲謝
事久矣為世故所牽不幸至此豈命也夫因憂憤成疾
保大元年卒年七十九子昌齡左承制昌嗣洺州刺史
昌朝鎮寧軍節度

蕭文宇國華外戚之賢者也父直善安州防禦使文篤
志力學喜愠不形太康初掌秦越國王中丞司事以才

幹稱尋知北面帖黃王邦彥子爭蔭數歲不能定有司以聞上命文誥之立決車駕將還宮承詔閱習儀衛雖執事林林指顧如一遷同知奉國軍節度使歷國舅都監壽隆末知易州兼西南面安撫使高陽土沃民富吏其邑者每黷于貨民甚苦之文始至悉去舊弊務農桑崇禮教民皆化之時大旱百姓憂甚文禱之輒雨屬縣又蝗議捕除之文曰蝗天災捕之何益但反躬自責蝗盡飛去遺者亦不食苗散在草莽為烏鵲所食會靈雨

不止文復隨禱而霽是歲大熟朝廷以文可大用遷唐古部節度使高陽勒石頌之後不知所終

馬人望字儼叔高祖眉鄉為石晉青州刺史太祖兵至堅守不降城破被執太祖義而釋之徙其族于醫巫閭山因家馬曾祖廷煦南京留守祖淵中京副留守父詮中京文思使人望穎悟幼孤長以才學稱咸雍中第進士為松山縣令歲運澤州官炭獨役松山人望請于中京留守蕭托歡均役他邑托歡怒下吏繫幾百日復引

詰之人望不屈蕭喜曰君為民如此後必大用以事聞
于朝悉從所請徙知涿州新城縣縣與宋接境驛道所
從出人望治不擾吏民畏愛近臣有聘宋還者帝問以
外事多薦之擢中京度支司鹽鐵判官轉南京三司度
支判官公私兼裕遷警巡使京城獄訟填委人望處決
無一冤者會檢括戶口未兩旬而畢同知留守蕭保先
怪而問之人望曰民產若括之無遺他日必長厚斂之
弊大率十得六七足矣保先謝曰公慮遠吾不及也先

是樞密使伊遜竊弄威柄卒害太子及天祚嗣位將討
父仇選人望與蕭報恩究其事人望平心以處所活甚
衆改上京副留守會劇賊趙鍾格犯闕劫宮女御物人
望率衆捕之右臂中矢炷以艾力疾馳逐賊棄所掠而
遁人望令關津譏察行旅悉獲其盜尋擢樞密都承旨
宰相耶律儼惡人望與已異遷南京諸宮提轄制置歲
中為保靜軍節度使有二吏兇暴民畏如虎人望假以
辭色陰令發其事黥配之是歲諸處饑乏惟人望所治

粒食不闕路不鳴桴遂授彰義軍節度使遷中京度支使始至府廩皆空視事半歲積粟十五萬斛錢二十萬緡徙左散騎常侍累遷樞密直學士未幾拜參知政事判南京三司使事時錢粟出納之弊惟燕為甚人望以縑帛為通歷凡庫物出入皆使別籍名曰臨庫姦人黠吏莫得軒輊乃以年老揚言道路朝論不察改南院宣徽使以示優老踰年天祚手書宣馬宣徽四字詔之既至諭曰以卿為老誤聽也遂拜南院樞密使人不敢干

以私用人必公議所當與者如曹勇義虞仲文嘗為姦人所擠人望推薦皆為名臣當時民所甚患者驛遞馬牛旗鼓鄉正廳隸倉司之役至破產不能給人望使民出錢官自募役時以為便久之請老以守司徒兼侍中致仕卒諡曰文獻人望有操守喜怒不形未嘗附麗求進初除執政家人賀之人望愀然曰得勿喜失勿憂抗之甚高擠之必酷其畏慎如此

即律都勒幹字伊實音季父房之後廉約重義重熙末

給事誥勅院咸雍中累遷同知南京留守事被召以部
民懇留賜詔褒獎太康初改西南面招討使為北面林
牙遷左伊勒希巴大安中拜南府宰相壽隆初致仕卒
都勒幹所至有聲吏民畏愛及退居鄉里子布庫為烏
爾古部節度使遣人來迎既至見積委甚富謂子曰辭
親入仕當以裕國安民為事枉道欺君以苟貨利非吾
志也命駕而歸布庫後為盜所殺

楊遵勗字益誠涿州范陽人重熙十九年登進士第調

儒州軍事判官累遷樞密院副承旨咸雍三年為宋國
賀正使還遷都承旨天下之事叢于樞府簿書填委遵
勗一目五行俱下剖決如流敷奏詳敏上嘉之奉詔徵
戶部通錢得四十餘萬緡拜樞密直學士改樞密副使
太康初參知政事徙知樞密院事兼門下侍郎平章事
拜南府宰相耶律伊遜誣皇太子詔遵勗與雅克案其
事遵勗不敢正言時議短之尋拜北府宰相大安中暴
卒年五十六贈守司空諡康懿子晦終昭文館直學士

王棠涿州新城人博古善屬文重熙十五年擢進士鄉貢禮部廷試對皆第一累遷上京鹽鐵使或誣以賄無狀釋之遷東京戶部使太康二年遼東饑民多死請振恤從之三年入為樞密副使拜南府宰相大安末卒棠練達朝政臨事不怠在政府修明法度有聲

論曰孟子論民為貴社稷次之司牧者當如何以盡心公鼎奏罷完隄役以息民拒公主假貸以守法單騎行却化盜為良庶幾召杜之美文知易州雨暘應禱蝗不

為災人望為民不避囚繫判度支公私兼裕亦卓乎未
易及已都勒幹吏畏民愛楊遵勗決事如流真能吏哉

遼史卷一百五

遼史卷一百五考證

蕭文傳後不知所終 按弘簡錄云蕭文遷唐古部節
度使卒而本傳乃云不知所終謹附識

遼史卷一百五考證

欽定四庫全書

遼史卷一百六

元中書右丞相總裁托克托等修

列傳第三十六

卓行

遼之共國任事耶律蕭二族而已二族之中有退然自足不淫於富貴不詘於聲利可以振頽風激薄俗亦足嘉尚者得三人焉作卓行傳

蕭扎拉字實訥北府宰相巴雅爾之弟性介時不事生業保寧間以戚屬進至寧遠軍節度使秩滿里居淡泊自適統和末召為南京馬步軍都指揮使以疾求退不聽遷伊勒布巴又辭疾許之遂入頡山杜門不出上嘉其志不復徵扎拉自是家於頡山親友或過之終日言不及世務凡宴游相邀亦不拒一歲山居過半與世俗不偶耶律資忠重之目曰頡山老人卒

耶律官努字奚隱林牙幹魯之孫沉厚多學詳於本朝

世系嗜酒好佚初徵為宿直將軍重熙九年以疾去官
上以官努屬尊欲成其志乃許自擇一路節度使官努
辭曰臣愚鈍不任官使加歸義軍節度使輒請致政官
努與烏哩特人蕭幹友善幹謂官努曰仕不能致主澤
民成大功烈何屑屑為也吾與若居林下以枕簟自隨
觴詠自樂雖不官無慊焉官努然之時稱二逸乾統間
卒

蕭普爾布字綏蘭魏國王惠之四世孫父母蚤喪鞠于

祖烏爾古納性孝悌年十三烏爾古納卒以早失怙恃
復遭祖喪哀毀踰禮族里嘉歎嘗謂人言我于親不得
終養今誰為訓者苟不自勉何以報鞠育恩自是力學
於文藝無不精乾隆間以烏爾古納之故召之不應與
親識游獵山水奉養無長物僕隸欣欣如也或曰公胡
不念以嗣先世功名答曰自度不足以繼先業年踰強
仕安能益主庇民累徵皆以疾辭晚年謝絕人事卜居
瑪古山屏遠葦茹潛心佛書延有道者談論彌日人問

所得何如但曰有深樂惟覺六鑿不相攘餘無知者一日易服無疾而逝

論曰隱固未易為也而亦未可輕以與人若扎拉謝職不談時務官努兩辭節鎮普爾布召而不赴雖未足謂之隱然在當時能知內外之分甘於肥遯不猶愈於求富貴利達而為妻妾羞者哉故稱卓行可也

遼史卷一百六

遼史卷一百六考證

耶律官努傳乾統間卒

按原本書官努卒官努二字

係衍今據列傳體例刪

遼史卷一百六考證

欽定四庫全書

遼史卷一百七

元中書右丞相總裁托克托等修

列傳第三十七

列女

男女居室人之大倫與其得烈女不若得賢女天下而有烈女之名非幸也詩讚衛共姜春秋褒宋伯姬蓋不得已所以重人倫之變也遼據北方風化視中土為疎

終遼之世得賢女二烈女三以見人心之天理有不與世道存亡者

邢簡妻陳氏營州人父陘五代時累官司徒陳氏甫笄涉通經義凡覽詩賦輒能誦尤好吟咏時以女秀才名之年二十歸於簡孝舅姑閨門和睦親黨推重有六子陳氏親教以經後二子抱朴抱質皆以賢位宰相統和十二年卒睿智皇后聞之嗟悼贈魯國夫人刻石以表其行及遷祔遣使以祭論者謂貞靜柔順婦道母儀始

終無歎云

耶律氏太師達魯之妹小字常格幼與秀有成人風及
長操行修潔自誓不嫁能詩文不苟作讀通歷見前人
得失歷能品藻咸雍間作文以述時政其略曰君以民
為體民以君為心人主當任忠賢人臣當去比周則政
化平陰陽順欲懷遠則崇恩尚德欲強國則輕徭薄賦
四端五典為治教之本六府三事實生民之命淫侈可
以為戒勤儉可以為師錯枉則人不敢詐顯忠則人不

敢欺勿泥空門崇飾土木勿事邊鄙妄費金帛滿當思
濫安必慮危刑罰當罪則民勸善不實遠物則賢者至
建萬世盤石之業制諸部強橫之心欲率下則先正身
欲治遠則始朝廷上稱善時樞密使耶律伊遜愛其才
屢求詩常格遺以回文伊遜知其諷已銜之太康三年
皇太子坐事伊遜誣以罪按無跡獲免會兄達魯謫鎮
州常格與俱嘗布衣蔬食人問曰何自苦如此對曰皇
儲無罪遭廢我輩豈可美食安寢及太子被害不勝哀

痛年七十卒于家

耶律努妻蕭氏小字意辛國舅駙馬都尉托斯和之女
母呼敦公主意辛美姿容年二十適努事親睦族以
孝謹聞嘗與娣姒會爭言厭魅以取夫寵意辛曰厭魅
不若禮法衆問其故意辛曰修己以潔奉長以敬事夫
以柔撫下以寬毋使君子見其輕易此之謂禮法自然
取重於夫以厭魅獲寵獨不愧于心乎聞者大慙初努
與樞密使伊遜有隙及皇太子廢被誣奪爵没入興聖

宮流烏爾古部上以章辛公主女欲使絕婚意辛辭曰
陛下以妾葭莩之親使免流竄實天地之恩然夫婦之
義生死以之妾自笄年從努一旦臨難頓爾乖離背綱
常之道於禽獸何異幸陛下哀憐與努俱行妾即死無
恨帝感其言從之意辛久在貶所親執役事雖勞無難
色事夫禮敬有加于舊壽隆中上書乞子孫為著帳郎
君帝嘉其節召舉家還于國隱乾統間始仕保大中意
辛在臨漢謂諸子曰吾度盧彥倫必叛汝輩速避我當

死之賊至遇害

耶律珠展妻蕭氏小字額勒本國舅貝勒之女性端慤
有容色自幼與他女異年十八歸珠展謹裕貞婉娣姒
推尊之及居珠展喪極哀毀既葬謂所親曰夫婦之道
如陰陽表裏無陽則陰不能立無表則裏無所附妾今
不幸失所天且生必有死理之自然珠展早歲登朝有
才不壽夭禍妾身罹此酷罰復何依恃儻死者可見則
從不可見則當與俱侍婢慰勉竟無回意自必而卒

耶律中妻蕭氏小字綏蘭韓國王惠之四世孫聰慧謹
愿年二十歸於中事夫敬順親戚咸譽其德中嘗謂曰
汝可粗知書以前貞淑為鑑遂發心誦習多涉古今天
慶中為賊所執潛置於履誓曰人欲汙我者即死之
至夜賊遁而免久之帝召中為五院都監中謂妻曰吾
本無宦情今不能免我當以死報國汝能從我乎綏蘭
對曰謹奉教及金兵徇地嶺西盡徙其民中守節死綏
蘭悲戚不形於外人怪之俄躍馬突出至中死所自殺

論曰陳氏以經教二子並為賢相耶律氏自潔不嫁居
閨閫之內而不忘忠其君非賢而能之乎三蕭氏之節
雖烈丈夫有不能者矣

遼史卷一百七

欽定四庫全書

遼史卷一百八

元中書右丞相總裁托克托等修

列傳第三十八

方技

孔子稱小道必有可觀醫卜是已醫以濟天札卜以決
猶豫皆有補於國有惠於民前史錄而不遺故傳

珠勒呼吐谷渾人初太祖破吐谷渾一騎士棄橐反射

不中而去及追兵開索視之中得一嬰兒即珠勒呼也
因所俘者問其故乃知射索者嬰之父也世善醫雖馬
上視疾亦知標本意不欲子為人所得欲殺之耳由是
進於太祖淳欽皇后收養之長亦能醫專事鍼灸太宗
時以太醫給侍嘗撰脉經諸鍼灸書行世年九十卒

王白冀州人明天文善卜筮晉司天少監太宗入汴得
之應歷十九年王子扎穆以事下獄其母求卜白曰此
人當王未能殺也毋過憂景宗即位釋其罪封寧王竟

如其言凡決禍福多此類保寧中厯彰武興國二軍節度使撰百中歌行于世

魏璘不知何郡人以卜名世太宗得于汴天祿元年上命馳馬較遲疾以為勝負問王白及璘孰勝白奏曰赤者勝璘曰臣所見驄馬當勝既馳竟如璘言上異而問之白曰今日火王故知赤者勝璘曰不然火雖王而上有烟以烟察之青者必勝上嘉之五年察克謀逆私卜于璘璘始卜謂曰大王之數得一日矣宜慎之及亂果

敗應歷中周兵犯燕上以勝敗問璘璘曰周姓柴也燕分火也柴入火必焚其言果驗璘嘗為太平王雅斯哈卜偕立事上聞之免死流烏爾古部一日節度使召璘有獻雙鯉者戲曰君卜此魚何時得食璘良久答曰公與僕不出今日有不測禍奚暇食魚急命烹之未及食寇至俱遇害

耶律達魯字縑布斡其先本五院之族始置宮分隸焉達魯精于醫察形色即知病源雖不診候有十全功統

初初為大丞相韓德讓所薦官至節度使初樞密使耶律色珍妻有沈痼易數醫不能治達魯視之曰心有畜熱非藥石所及當以意療因其瞶眊之使狂用泄其毒則可於是令大擊鈺鼓於前翌日果狂叫呼怒罵力極而止遂愈治法多此類人莫能測年八十卒

耶律伊伯格勒字錫訥六院郎君尼古察之後幼好學尤長卜筮不樂仕進嘗為人擇墓地曰後三日有牛乘人逐牛過者即啟土至期果一人負乳犢引犍牛而過

其人曰所謂牛乘人者此也遂啟土既葬吉凶盡如其言又為失鷹者占曰鷹在汝家東北三十里灤西榆上往求之果得當時占候無不驗

論曰方技術者也苟精其業而不畔于道君子必取焉珠勒呼王白耶律達魯無大得失錄之宜矣魏璘為察克卜謀逆為雅斯哈卜僭立罪在不貲雖有寸長亦奚足取哉存而弗削為來者戒

遼史卷一百八

欽定四庫全書

遼史卷一百九

元中書右丞相總裁托克托等修

列傳第三十九

伶官

伶官之微者也五代史列鏡新磨於傳是必有所取矣
遼之伶官當時固多然能因諛諂示諫以消未形之亂
惟羅衣輕耳孔子曰君子不以人廢言是宜傳

羅衣輕不知其鄉里滑稽通變一時諧謔多所規諷興
宗敗於李元昊也單騎突出幾不得脫先是元昊獲遼
人輒剗其鼻有奔北者惟恐追及故羅衣輕止之曰且
觀鼻在否上怒以毳索繫帳後將殺之太子笑曰打譚
底不是黃幡綽羅衣輕應聲曰行兵底亦不是唐太宗
上聞而釋之上嘗與太弟重元狎昵宴酣許以千秋萬
歲後傳位重元喜甚驕縱不法又因雙陸賭以居民城
邑帝屢不競前後已償數城重元既恃梁孝王之寵又

多鄭叔段之過朝臣無敢言者道路以目一日復博羅衣輕指其局曰雙陸休癡和你都輸去也帝始悟不復戲清寧間以疾卒

宦官

周禮寺人掌中門之禁至卷伯詩列于雅勅紹功著于晉雖忠於所事而非其職矣漢唐中世竊權蠹政有不忍言者是皆寵遇之過遼宦者二人其賢不肖皆可為鑑故傳焉

王繼恩隸州人睿知皇后南征繼恩被俘初皇后以公
私所獲十歲以下兒容貌可觀者近百人載赴涼陘並
使闡為豎繼恩在焉聰慧通書及遼語擢內謁者內侍
左廂押班聖宗親政累遷尚衣庫使左承宣監門衛大
將軍靈州觀察使內庫都提點繼恩好清談不喜權利
每得賜賚市書至萬卷載以自隨誦讀不倦每宋使來
聘繼恩多充宣賜使後不知所終

趙安仁字小喜深州樂壽人自幼被俘統和中為黃門

令秦晉國王府祇候王薨授內侍省押班御院通進開
泰八年與李勝格謀奔南土為游兵所擒初仁德皇后
與欽哀有隙欽哀密令安仁伺皇后動靜無不知者仁
德皇后威權既重安仁懼禍復謀亡歸仁德欲誅之欽
哀以言營救聖宗曰小喜言父母兄弟俱在南朝每念
及神魂隕越今為思親冒死而亡亦孝子用心實可憐
憫赦之重熙初欽哀攝政欲廢帝立少子重元帝與安
仁謀遷太后慶州守陵授安仁左承宣監門衛大將軍

充契丹漢人渤海內侍都知兼都提點會上思太后親
馭奉迎太后責曰汝負萬死我嘗營救不望汝報何為
離間我母子邪安仁無答後不知所終

論曰名器所以勵天下非賢而有功則不可授况宦者
乎繼恩為內謁者安仁為黃門令似矣何至溺於私愛
而授以觀察使大將軍耶易曰負且乘致寇至此安仁
所以不克有終繼恩幸而免歟

遼史卷一百九

欽定四庫全書

遼史卷一百十

元中書右丞相總裁托克托等修

列傳第四十

姦臣上

春秋褒貶善惡並書示勸懲也故遷固傳佞幸酷吏歐陽修則并姦臣錄之將俾為君者知所鑒為臣者知所戒此天地聖賢之心國家安危之機治亂之原也遼自

耶律伊遜而下姦臣十人其敗國皆足以為戒故列於傳

耶律伊遜字呼都克琨五院部人父達喇家貧服用不給人號窮達喇初伊遜母方娠夜夢手搏殺羊拔其角尾既寤占之術者曰此吉兆也羊去角尾為王字汝後有子當王及伊遜生適在路無水以浴迴車破轍忽見湧泉達喇自以得子欲酒以慶聞酒香于草棘間得二榼因祭東焉伊遜幼慧黠嘗牧羊至日昃達喇視之伊

遜熟寢達喇觸之覺伊遜怒曰何遽驚我適夢人手執
日月以食我我已食月啗日方半而覺惜不盡食之達
喇自是不令牧羊及長美風儀外和內狻重熙中為文
班吏掌太保印陪從入宮皇后見伊遜詳雅如素宦命
補筆硯吏帝亦愛之累遷護衛太保道宗即位以伊遜
先朝任使賜漢人戶四十同知點檢司事常召決疑議
陞北院同知歷樞密副使清寧五年為南院樞密使改
知北院封趙王九年耶律仁先為南院樞密使時駙馬

都尉蕭呼都克與重元黨惡仁先在朝白仁先可任西北路招討使帝將從之伊遜奏曰臣新參國政未知治體仁先乃先帝舊臣不可遽離朝廷帝然之重元亂平拜北院樞密使進王魏賜匡時翊聖竭忠平亂功臣咸雍五年加守太師詔四方有軍旅許以便宜從事勢震中外門下饋賂不絕凡阿順者蒙薦擢忠直者被斥竄太康元年皇太子始預朝政法度修明伊遜不得逞謀以事誣皇后既死伊遜不自安又欲害太子因乘間入

奏曰帝與后如天地並位中宮豈可曠盛稱其黨駙馬
都尉蕭錫默之妹美而賢上信之納于宮尋冊為皇后
時護衛蕭和克知伊遜姦狀伏橋下欲殺之俄暴雨壞
橋謀不遂林牙蕭巖壽密奏曰伊遜自皇太子預政內
懷疑懼又與宰相張孝傑相附會恐有異圖不可使居
要地出為中京留守伊遜泣謂人曰伊遜無過因讒見
出其黨蕭錫默輩以其言聞於上上悔之無何出蕭巖
壽為順義軍節度使詔近臣議召伊遜事北面官屬無

敢言者耶律薩喇曰初以蕭巖壽奏出伊遜若所言不當宜坐以罪若當則不可復召累諫不從乃復召為北院樞密使時皇太子以母后之故憂見顏色伊遜黨欣躍相慶譏謗沸騰忠良之士斥逐殆盡伊遜因蕭錫沙之言夜召蕭塔喇台謀構太子令護衛太保耶律扎拉誣告耶律薩喇等同謀立皇太子詔按無迹而罷又令牌印郎君蕭額都溫詣上誣首耶律察喇前告耶律扎拉等事皆實臣亦與其謀本欲殺伊遜等而立太子臣

等若不言恐事白連坐詔使鞠劾伊遜迫令具伏上怒命誅薩喇及蘇色等伊遜恐帝疑引數人庭詰各令荷重校繩繫其頸不能出氣人人不堪其酷惟求速死反奏曰別無異辭時方暑尸不得瘞以至地臭乃囚皇太子於上京監衛者皆其黨尋遣蕭達魯噶薩巴害太子伊遜黨大喜聚飲數日上京留守蕭塔坦以卒聞上哀悼欲召其妻伊遜陰遣人殺之以滅其口五年正月上將出獵伊遜奏留皇孫上欲從之同知點檢蕭烏納諫

曰陛下若從伊遜留皇孫皇孫尚幼左右無人願留臣保護以防不測遂與皇孫俱行由是上始疑伊遜頗知其姦會北幸將次黑山之平定上適見扈從官屬多隨伊遜後惡之出伊遜知南院大王事及例削一字王爵改王混同意稍有安及赴闕入謝帝即日遣還改知興中府事七年冬坐以禁物鬻入外國下有司議法當死伊遜黨耶律雅克獨奏當入八議得減死論擊以鐵骨采幽於來州後謀奔宋及私藏兵甲事覺縊殺之乾統

二年發塚戮其屍

張孝傑建州永霸縣人家貧好學重熙二十四年擢進士第一清寧間累遷樞密直學士咸雍初坐誤奏事出為惠州刺史俄召復舊職兼知戶部司事三年參知政事同知樞密院事加工部侍郎八年封陳國公上以孝傑勤幹數問以事為北府宰相漢人貴幸無比太康元年賜國姓明年秋獵帝一日射鹿三十燕從官酒酣命賦雲上于天詩詔孝傑坐御榻傍上誦黍離詩知我者

謂我心憂不知我者謂我何求孝傑奏曰今天下太平
陛下何憂富有四海陛下何求帝大悅三年羣臣侍燕
上曰先帝用仁先華格以賢智也朕有孝傑伊邈不在
仁先華格下誠為得人歡飲至夜乃罷是年夏伊邈諧
皇太子孝傑同惡相濟及伊邈受詔按皇太子黨人誣
害忠良孝傑之謀居多伊邈薦孝傑忠於社稷帝謂孝
傑可比狄仁傑賜名仁傑乃許放海東青鵲六年既出
伊邈上亦悟孝傑姦佞尋出為武定軍節度使坐私販

廣濟湖鹽及擅改詔旨削爵貶安肅州數年乃歸大安
中死於鄉乾統初剖棺戮屍以族產分賜臣下孝傑久
在相位貪貨無厭時與親戚會飲嘗曰無百萬兩黃金
不足為宰相家初孝傑及第詣佛寺忽迅風吹孝傑幘
頭與浮圖齊墜地而碎有老僧曰此人必驟貴然亦不
得其死竟如其言

耶律雅克字善寧季父房之後四世祖托音太祖異母
弟父曰呼魯蘇官至太師雅克狡佞而敏清寧間為左

護衛太保太康初轉北面林牙初耶律伊遜自中京留守復為樞密使以雅克為耳目凡聞見必以告伊遜愛而薦之帝亦以為賢拜左伊勒希巴及太子被誣帝遣雅克往訊之太子謂雅克曰帝惟我一子今為儲嗣復何求敢為此事公與我為昆弟行當念無辜達意於帝禱之甚懇蕭錫沙聞之謂雅克曰宜以太子言易為伏狀雅克頷之盡如所教以奏及太子被逐伊遜殺害忠良多雅克之謀為契丹行宮都部署五年夏拜南府宰

相遷特哩袞大安三年為西京留守致仕壽隆初卒

蕭錫沙摩和納部人父都勒幹厯官節度使錫沙辨點
善揣摩人意清寧間以年勞遷護衛太保太康初耶律
伊遜復入樞府益橫恣時錫沙出入伊遜家以朝臣不
附者輒使出之錫沙由宿衛遷殿前副點檢三年夏護
衛蕭和克等謀殺伊遜事覺下獄錫沙謂伊遜曰今太
子猶在臣民屬心大王素無根柢之助復有誣皇后之
怨若太子立王置身何地宜熟計之伊遜曰吾憂此久

矣是夜召蕭塔喇台謀所以構太子事錫沙計既行尋遷殿前都點檢兼同知樞密院事復令蕭額圖琿等誣首耶律扎拉前告耶律薩喇等事皆實詔究其事太子不服遣伊勒希巴耶律雅克問太子太子具陳所以見誣之狀錫沙聞之謂雅克曰如此奏則大事去矣當易其辭為伏款雅克入如錫沙言奏之上大怒廢太子太子將出曰我何罪至是錫沙叱令登車遣衛卒闔車門是年遷北院樞密副使復陳陰害太子計伊遜從之及

伊遜出知南院大王事亦出錫沙為保州統軍使卒乾
統間剖棺戮屍二子達勒達年結皆伏誅



遼史卷一百十

欽定四庫全書

史部

遼史卷一百十一至
五

詳校官庶吉士臣何道冲

給事中臣查善長覆勘

總校官編修臣朱鈐

校對官庶吉士臣蔣予蒲

謄錄監生臣周濂

欽定四庫全書

遼史卷一百一十一

十一

元中書

右丞相總

裁托克托等修

列傳第四十一

十一

姦臣下

蕭額哩頁字額圖瑋國舅阿拉次子便佞滑稽善女工
重熙間以外戚進清寧初補祇候郎君尚鄭國公主拜
駙馬都尉累遷南面林牙以父阿拉為蕭格所譖出額

哩頁為奉先軍節度使十年冬召為北面林牙咸雍中
會有告額哩頁與族人珠展謀害耶律伊遜按無狀出
為寧遠軍節度使自後額哩頁揣伊遜意傾心事之薦
為國舅詳袞太康初封遼西郡王時伊遜擅恣凡不附
己者出之乃引額哩頁為北府宰相兼知契丹行宮都
部署事及伊遜謀構皇太子額哩頁多助成之遂知北
院樞密事賜推誠協贊功臣以女姪妻伊遜子蘇頁恃
勢橫肆至有無君之語朝野側目帝出伊遜知南院大

王事坐與伊遜黨以天平軍節度使歸第尋拜西北路
招討使以母憂去官卒

耶律赫魯字和爾沁六院錫里尼古察之後柔佞喜苟
合仕清寧初時伊遜引用羣小赫魯附之遂見委任俄
擢南面林牙伊遜譖皇太子殺忠直赫魯多預其謀弟
烏頁亦黨伊遜時號二賊伊遜薦為北院大王卒烏頁
亦至南院大王

蕭塔喇台約尼溫汗宮分人善阿意順辭色清寧初伊

遜用事甚見引用累遷北面林牙同知北院宣徽使事
及皇太子廢遣塔喇台監送上京塔喇台促其行不令
下車起居飲食數加陵侮至則築圍堵囚之太康中遷
西南招討使歷順義軍節度使轉國舅詳袞壽隆五年
坐怨望以老免死闔門籍興聖宮貶西北統軍司卒二
子特默額埒乾統間以父與伊遜謀伏誅

蕭額圖瑁國舅少父房之後咸雍中補牌印郎君太康
三年樞密使伊遜陰懷逆謀乃令護衛太保耶律扎拉

誣告耶律薩喇等廢立事詔按無狀皆補外項之額圖
琿希伊遜意欲實其事與耶律托卜嘉等入闕誣奏耶
律薩喇等謀害伊遜欲立皇太子事臣亦預謀今不自
言恐事泄連坐帝果怒徙皇太子于上京額圖琿尚皇
女趙國公主為駙馬都尉後與伊遜議不合銜之復以
車服僭擬人主被誅額圖琿臨刑語人曰前告耶律薩
喇事皆伊遜教我恐事彰殺我以滅口耳

蕭達嚕噶約尼繖古汗宮分人心術姦險清寧間伊遜

為樞密使竊權用事陰懷逆謀達嚕噶比附之遂見獎
拔稍遷至旗鼓伊喇詳袞伊遜欲害太子以達嚕噶允
果可使遣與近侍直長薩巴詣上京同留守蕭塔坦夜
引力士至囚室給以有赦召太子出殺之函其首以歸
詐云疾薨以達嚕噶為國舅詳袞達嚕噶恐殺太子事
白出入常佩刀有急召即欲自殺乾統間詔樞密使耶
律阿蘇大索伊遜黨人達嚕噶以賂獲免後以疾卒
耶律托卜嘉仲父房之後以善擊鞠幸於上凡馳騁鞠

不離杖咸雍初補祇候郎君與耶律伊遜善故内外畏之及太子被譖按無迹托卜嘉附伊遜欲實其誣與頗圖琿等密奏太子謀亂事本實臣不首恐事覺連坐帝信之廢太子改迺慶宮副使壽隆元年為行宮都部署天祚嗣位以托卜嘉黨伊遜出為特們部節度使及樞密使耶律阿蘇大索伊遜舊黨托卜嘉以賂免徙德哱勒部節度使復為敦睦宮使天慶元年出為西北路招討使以疾卒

蕭特古斯字和寧卓特部人仕重熙中以能稱累遷左中丞清寧初歷北面林牙改北院樞密副使辨敏善伺顏色應對合上意皇太后嘗曰有大事非耶律華格蕭特古斯不能決眷遇日隆知北院樞密使事六年出知黃龍府八年拜南府宰相頃之為北院樞密使詔許便宜從事為人姦佞有餘好聚斂專愎變更法度為樞密數月所薦引多為重元黨與由是免為庶人後沒入興聖宮卒

論曰舜流共工孔子誅少正卯治姦之法嚴矣後世不
是之察反以為忠而信任之不至於流毒宗社而未已
道宗之於伊邈是也當其留仁先討重元若真為國計
者不知包藏禍心待時而發耳一旦專權又得孝傑雅
克錫沙為腹心故肆惡而無忌憚始誣皇后又殺太子
及其妃其禍之酷良可悲哉嗚呼君之所親莫皇后
太子若也姦臣殺之而不知羣臣言之而不悟一時忠
謹廢戮幾盡雖黑山親見官屬之威僅削一字王號至

私藏甲兵然後誅之吁伊邈之罪固非一死可謝天下
抑亦道宗不明無斷有以養成之也如蕭額哩頁革忘
君黨惡以饗富貴雖幸而死諸牖下其得免於遺臭之
辱哉

遼史卷一百十一

欽定四庫全書

遼史卷一百十二

元中書右丞相總裁托克托等修

列傳第四十二

逆臣上

易曰天尊地卑乾坤定矣卑高以陳貴賤位矣貴賤位而後君臣之分定君臣之分定而後天地和天地和而後萬化成五帝三王之治用此道也三代而降臣弑其

君者有之子弑其父者有之孔子作春秋以寓王法誅死者於前懼生者於後其慮深遠矣歐陽修作唐書創逆臣傳蓋亦春秋之意也遼叛逆之臣二十有二迹其事則又有甚焉者然豈一朝一夕之故哉列于傳所以公天下之貶以示夫戒云

希達字納爾琿肅祖孫額爾奇木塔拉之子幼黠而辯險佞者多附之約尼哈陶津汗時與母兄阿古齊為德呼勒部額爾奇木故事為額爾奇木者得行再生禮阿古

齊方就帳易服希達遂取紅袍貂蟬冠乘白馬出令黨
人大呼曰額爾奇木出矣衆羅拜因行柴冊禮自立為
額爾奇木與裕悅耶律寶魯同知國政及寶魯遇害希
達懼人圖已挈其二子塔喇台碩格奔渤海偽為失明
後因毬馬之會與二子奪良馬奔歸國益為姦惡常以
巧辭獲免太祖將即位讓希達希達曰皇帝聖人由天
所命臣豈敢當太祖命為裕悅及自將伐西南諸部希
達誘塔克等亂不從者殺之車駕還至赤水城希達懼

與埒克俱北走至榆河為追兵所獲太祖問曰朕初即位嘗以國讓叔父辭之今反欲立吾弟何也希達對曰始臣不知天子之貴及陛下即位衛從甚嚴與凡庶不同臣嘗奏事心動始有窺覷之意度陛下英武必不可取諸弟懦弱得則易圖也事若成豈容諸弟乎太祖謂諸弟曰汝輩乃從斯人言耶曰謀大事者須用如此人事成亦必去之希達不復對因數月縊殺之將刑太祖謂曰叔父罪當死朕不敢赦事有便國者宜悉

言之希達曰德呼勒人衆勢強故多為亂宜分為二以弱其勢子塔喇台

塔喇台字海蘭有膂力善馳射馬躡不仆尤神于醫視人疾若隔紗覩物莫不悉見太祖在潛已加眷遇及即位拜德呼勒額爾奇木太祖思鹿醢解醒以山林所有問能取者塔喇台曰臣能得之乘內廐馬逐鹿射其一欲復射馬跌而斃塔喇台躍而前弓猶不弛復獲其一帝歡甚曰吾弟萬人敵會帝患心痛召塔喇台視之塔

喇台曰膏肓有瘀血如彈丸然藥不能及必鍼而後愈
帝從之嘔出瘀血痛止帝以其親每加賜賚然知其為
人未嘗任以職後從埒克亂與其父希達俱縊殺之

華格字薩蘭隋國王實魯之子性陰險初忝其父妾懼
事彰與剋蕭特依順等共害其父歸咎特依順華格獲
免太祖即位務廣恩施雖知華格兇逆姑示含忍授以
特哩袞六年華格預諸弟之亂事平羣臣議其罪皆謂
華格不可釋於是與子罕札俱凌遲而死勅軍士恣取

其產帝曰華格不畏上天反君弑父其惡不可言諸弟作亂皆此人教之也

察克字烏紳明王安圖之子善騎射貌恭而心狡人以為懦太祖曰此兇頑非懦也其父安圖嘗使奏事太祖謂近侍曰此子目若風駝面有反相朕若獨居無令入門世宗即位于鎮陽安圖聞之欲持兩端察克曰太弟忌刻若果立豈容我輩永康王寬厚且與瑠格相善宜往與計安圖即與瑠格謀歸世宗及和議成以功封泰

寧王會安圖為西南面大詳袞察克佯為父惡陰遣人
白於帝即召之既至上前泣訴不勝哀帝憫之使領鈕
祜祿軍出入禁中數被恩遇帝每出獵察克託手疾不
操弓矢但執鍊鎚馳走屢以家之細事聞於上上以為
誠察克以諸族屬雜處不克以逞漸徙廬帳迫於行宮
右皮室詳袞耶律烏哲察其姦邪表列其狀帝不信以
表示察克察克稱烏哲疾已哽咽流涕帝曰朕固知無
此何至泣耶察克時出怨言烏哲曰汝雖無是心因我

過疑汝勿為非義可也他日烏哲又請於帝帝曰察克
捨父事我可保無他烏哲曰察克於父既不孝於君安
能忠帝不納天祿五年七月帝幸太液谷留飲三日察
克謀亂不果帝伐周至和尚山太后與帝祭文獻皇帝
于行宮羣臣皆醉察克歸見壽安王邀與語王弗從察
克以謀告耶律瓚都瓚都從之是夕同率兵入弑太后
及帝因僭位號百官不從者執其家屬至夜閱內府物
見嗎碯盃曰此希世寶今為我有說于其妻妻曰壽安

王烏哲在吾屬無噍類此物何益察克曰壽安年幼烏
哲不過引數奴詰旦來朝固不足憂其黨舒蘇報壽安
烏哲以兵圍於外察克尋遣人弒皇后于柩前倉惶出
陣壽安遣人諭曰汝等既行弒逆復將若何有額爾奇
木和卓委兵歸壽安王餘衆望之徐徐而往察克知其
不濟乃繫羣官家屬執弓矢脅曰無過殺此曹爾叱令
速出時林牙耶律迪里亦在繫中進曰不有所廢壽安
王何以興藉此為辭猶可以免察克曰誠如公言誰當

使者迪里請與雅斯哈同往說之察克從其計壽安王復令迪里誘察克鸞殺之諸子皆伏誅

隆科字密遜文獻皇帝之子天祿五年遙授武定軍節度使及察克作亂穆宗與烏哲從林牙迪里計誘而出之隆科手必察克改南京留守穆宗沉湎不恤政事隆科有覬覦之心誘迪里及羣不逞謀逆事覺按問不服帝曰朕為壽安王時卿數以此事說我今日豈有虛乎隆科不能對及餘黨盡服遂縊於汗州西谷詔有司擇

絕後之地以葬

重元小字博齊希聖宗次子也材勇絕人眉目秀朗寡言笑人望而畏太平三年封秦國王聖宗崩欽哀皇后稱制密謀立重元重元以所謀白於上上益重之封為皇太弟歷北院樞密使南京留守知元帥府事重元處戎職未嘗離輦下先是契丹人犯法例須漢人禁勘受枉者多重元奏請五京各置契丹警巡使詔從之賜以金券誓書道宗即位冊為皇太叔免拜不名為天下兵

馬大元帥復賜金券四頂帽二色袍尊寵所未有清寧九年車駕獵灤水以其子尼嚕古素謀與同黨陳國王辰類知北院樞密事蕭呼都克等凡四百餘人誘脅努手軍陣于帷宮外將戰其黨多悔過効順各自奔潰重元既知失計北走大漠歎曰尼嚕古使我至此遂自殺先是重元將起兵帳前雨赤如血識者謂敗亡之兆子尼嚕古

尼嚕古小字伊羅幹性陰狠興宗一見謂曰此子目有

反相重熙十一年封安定郡王十七年進王楚為特哩
袞清寧二年出為武定軍節度使七年知南院樞密使
事說其父重元詐病俟車駕臨問因行弑逆九年秋獵
帝用耶律良之計遣人急召尼嚕古尼嚕古以事泄遽
擁兵犯行宮南院樞密使許王仁先等率宿衛士討之
尼嚕古躍馬突出為近侍詳袞渤海阿蘇護衛蘇射殺
之

遼史卷一百十二

欽定四庫全書

遼史卷一百十三

元中書右丞相總裁托克托等修

列傳第四十三

逆臣中

蕭翰一名迪里字哈準宰相達魯之子天贊初唐兵圍鎮州節度使張文禮遣使告急翰受詔與康求怛徃救克之殺其將李嗣昭拔石城會同初領漢軍侍衛八年

伐晉敗晉將杜重威追至望都翰奏曰可令軍下馬而射帝從其言軍士步進敵人持短兵猝至我軍失利帝悔之曰此吾用言之過至此及從駕入汴為宣武軍節度使會帝崩欒城世宗即位翰聞之委事於李從敏徑趨行在是年秋世宗與皇太后相拒於潢河橫渡和議未定太后問翰曰汝何怨而叛對曰臣母無罪太后殺之以此不能無憾初耶律烏哲以附太后被囚翰聞而快之即囚所謂曰汝嘗言我輩不及今在徑行何也對

曰第願公不至如此翰默然天祿二年尚帝妹額伯哩
後與天德謀反下獄復結特哩袞瑠格及其弟瑣都亂
耶律實喇告烏哲烏哲遽入奏翰等不伏帝不欲發其
事烏哲固諍以為不可乃詔烏哲鞫案翰伏辜帝免釋
之復與公主以書結明王安圖反烏哲得其書以奏翰
伏誅

德呼字蘇蘭六院額爾奇木博果濟之後天顯中為中
臺省右相會同二年與趙思溫持節冊晉帝及我師伐

晉至潯沱河降晉將杜重威德嘒功居多大同元年平
相州之叛斬首數萬世宗即位遣使馳報仍命德嘒執
偏將珠展以來其使誤入珠展營珠展得詔反誘德嘒
執送太后德嘒亡歸世宗和約既成封燕王為南京留
守天祿五年察克弒逆德嘒方醉其妻扶入察克之幕
因從之明旦壽安王討亂凡脅從者皆棄兵降德嘒不
降陵遲而死妻子皆誅

朗字烏紳季父房阿古齊之孫性輕佻多力人呼為呼

遜天顯間以材勇進每戰輒克由是得名會同九年太宗入汴命知澶淵控扼河渡天祿元年燕趙以南皆應劉知遠朗與汴守蕭翰棗城歸闕初朗祖阿古齊為其弟希達詐取額爾奇木自是族中無任六院職事者世宗不悉其事以朗為六院大王及察克作亂遣人報朗曰事成矣朗遣詳袞蕭呼哩以所部軍往命曰當持兩端助其勝者穆宗即位伏誅籍其家屬

瑠格字明隱太祖兄伊德實之子幼驕狠好陵侮人長

益兇狡太宗惡之使守邊徼累遷西南邊大詳衮會同
十年叔父安圖從帝伐晉以病先歸與瑠格鄰居世宗
立於軍中安圖議所往瑠格首建附世宗之策以本部
兵助之時太后命皇太弟魯呼率兵而南瑠格安圖遇
于泰德泉既接戰安圖墜馬王子天德馳至欲以槍刺
之瑠格以身衛安圖射天德貫甲不及膚安圖得馬復
戰太弟兵敗瑠格與安圖朝於行在及和議成太后問
瑠格曰汝何怨而叛對曰臣父無罪太后殺之以此怨

耳事平以功為特哩袞天祿中與弟瓚都王子天德侍
衛蕭翰謀反耶律實喇發其事瑠格以飾辭免後請帝
博欲因進酒弑逆帝覺之不果被囚一日召瑠格鎖項
以博帝問汝實反耶瑠格誓曰臣若有反心必生千頂
疽死遂賞之耶律烏哲固諍以為罪在不赦上命烏哲
按之具服詔免死流烏爾古部果以千頂疽死弟瓚都
瓚都殘忍多力膚若蛇皮天祿初以族屬為皮室詳袞
二年與兄瑠格謀反免死使於哈噶斯國既還復預察

克之亂陵遲而死異母弟二人和科里希斯應歷初無
職任以族子甚見優禮三年或告和科里希斯與衛王
完謀逆下獄飾辭獲免四年春復反伏誅

哈斯字鐸袞隋國王竇噶之庶子機警口辯會同五年
詔求直言時哈斯年十八衣羊裘乘牛詣闕有司問曰
汝何故來對曰應詔言事苟不以貧稚見遺亦可備直
言之選有司以聞會帝將出獵使謂曰俟吾還則見之
哈斯曰臣以陛下急於求賢是以來耳今反緩於獵請

從此歸帝聞即召見賜坐問以治道命明王安圖與耶律佛德試之數日安圖等奏曰哈斯之材臣等所不及帝召哈斯問曰與汝言者何如人也對曰安圖言無收檢若空車走峻坂佛德如著靴行曠野射鵠帝大笑擢宣嶽使屢任以事帝知其貧以金器賜之哈斯即散於親友後從帝伐晉有功世宗即位於軍中皇太后以兵逆於潢河橫渡太后遣耶律烏哲責世宗自立烏哲至帝前諭旨不屈世宗遣哈斯對亦不遜且命之曰汝見

烏哲勿懼哈斯見太后還不稱旨既和領太后諸局事
穆宗即位與冀王迪里謀反死獄中

迪里字烏納六院額爾奇木卓巴勒之子少多詐世宗
即位為羣牧都林牙察克謀亂官僚多被繫及壽安王
與耶律烏哲率兵來討諸黨以次引去察克度事不成
即詣囚所持弓矢脅曰悉殺此曹迪里進曰殺何益於
事竊料烏哲將立壽安王故為此舉且壽安未必知若
遣人籍此為辭度可免察克曰如公言誰可使者迪里

曰大王若不疑迪里請與雅斯哈同往說之察克遣之
壽安王用迪里計誘殺察克凡被脅之人無一被害者
皆迪里之力亂既平帝嘉賞然未顯用迪里失望居常
怏怏結羣不逞陰懷不軌應歷二年與其黨謀立隆科
事覺陵遲死

蕭格小字華格字和爾沁國舅房林牙華善之子警悟
多智數太平初累遷官職游近習間以說悅相比昵為
流輩所稱由是名達於上重熙初拜北面林牙十二年

為北院樞密副使帝嘗與近臣宴謂格曰朕知卿才故
自拔擢卿宜勉力格曰臣不才誤蒙聖知無以報萬一
惟竭愚衷安敢怠明年拜北府宰相十五年改同知北
院樞密事格恃權寵同僚具位而已時伊勒希巴耶律
義先知格姦佞因侍燕言格所短用之將敗事帝不聽
一日上令義先對格巡擲義先酒酣曰臣備位大臣縱
不能進忠去佞安能與賊博乎格銜之佯言曰公相謔
不既甚乎義先詬詈不已帝怒皇后解之曰義先酒狂

醒可治也翌日上詔格謂曰義先無禮可痛絕之格曰
義先之才豈逃聖鑒然天下皆知忠直今以酒過為罪
恐拂人望帝以格犯而不校眷遇益厚其矯情媚上多
此類拜南院樞密使詔班諸王上封吳王改知北院進
王鄭兼中書令帝大漸詔格曰大位不可一日曠朕若
弗寤宜即令燕趙國王嗣位清寧元年復為南院樞密
使更王楚復徙北院與國舅蕭阿拉同掌朝政格多私
撓阿拉每裁正之由是有隙出阿拉為東京留守會南

郊阿拉以例赴闕帝訪羣臣以時務阿拉陳利病言甚
激切格伺帝意不悅因譖曰阿拉恃寵有慢上心非臣
子禮帝大怒繼阿拉于殿下後上知格姦計寵遇漸衰
八年致仕封鄭國王九年秋格以其子為重元壻格預
其謀陵遲殺之

遼史卷一百十三

遼史卷一百十三考證

復與公主以書結明主王安圖反 明王安圖原文訛
安圖今改正又朗傳朗祖阿古齊原文前作菴古只
後又作菴谷只並畫一改

榴格傳會同十年叔父安圖從帝伐晉以病先歸 按
遼太宗伐晉始於會同六年冬十二月是月即有命
安圖等由滄恒易定分道進繼以大軍之詔越明年
春安圖入雁門圖忻代是年遼晉相持冬復徵兵南

伐明年春與晉數戰遼軍不利至會同九年冬十一月遼大敗晉軍晉將杜重威等率部衆降乃晉帝素服拜命是太宗親征由六年至九年而罷無九年以後事也又會同九年之明年改年大同元年傳稱會同十年尤非今仍原文而識其誤

遼史卷一百十三考證

欽定四庫全書

遼史卷一百十四

元中書右丞相總裁托克托等修

列傳第四十四

逆臣下

蕭呼都克字伊遜口吃視斜髮鬢伯父孝穆謂曰是兒
狀貌族中未嘗有及壯魁梧桀傲多揚人惡重熙中為
祗候郎君俄遷興聖宮使尚秦國長宮主授駙馬都尉

以不諧離婚復尚齊國公主為北面林牙清寧中歷北
南院樞密副使代族兄珠展為西北路招討使時蕭格
與蕭阿拉俱為樞密使不協格以珠展為阿拉所愛嫉
之珠展受代赴闕嘗借官粟留直而去呼都克希格意
發其事珠展因得罪呼都克又欲要權歲時遺珍玩畜
產于格二人相愛逾兄弟呼都克族弟迪里為北克薦
國舅詳袞蕭呼敦于呼都克呼都克見其辨給壯勇傾
交每休休言論終日人皆怪之會呼都克同知北院樞

密事奏呼敦及迪里可用帝以迪里為旗鼓伊喇詳裒
呼敦為宿直官及格構陷其兄阿拉呼敦陰為之助時
人醜之耶律伊遜知北院樞密事呼都克位在伊遜下
怏怏不平初呼都克與重元子尼嚕古謀逆欲其速發
會車駕獵太子山遂與尼嚕古脅弩手軍犯行宮既戰
尼嚕古中流矢而斃衆皆逃散時同黨耶律薩喇蕪在
圍場聞亂率獵夫來援其黨謂呼都克等曰我軍甚衆
乘其無備中夜決戰事冀有成若待旦其誰從我呼都

克曰倉卒中黑白不辨若內外軍相應則吾事去矣黎
明而發何遲之有重元聽呼都克之計令四面巡警待旦
是夜同黨立重元僭位號呼都克自為樞密使明日戰
敗呼都克被創單騎遁至十七灤投水死五子同日誅
蕭塔喇台字和爾沁國舅少父房之後父雙寬尚塔納
公主仕至國舅詳袞塔喇台幼警敏不羈好射獵太平
中以外戚補抵候郎君歷延昌宮使殿前副點檢重熙
十三年伐夏塔喇台將偏師首入敵境多所俘掠遷都

點檢改烏爾古德呼勒部都詳袞十八年再舉西伐塔喇台奏軍馬器械之事在選將夏人豈難制但嚴設斥堠不用掩襲計何慮不勝帝曰卿其速行無後師期既而塔喇台失利還復為都點檢十九年夏人來侵金肅軍上遣塔喇台率輕兵督戰至河南三角川斬候者八人擒觀察使以功命知漢人行宮都部署事出為西南面招討使族弟黃巴家奴告其主私議宮掖事塔喇台寢之事覺決大杖削爵為民清寧中上以所坐事非塔

喇台所犯起為南京統軍使至是從重元子尼嚕古等
亂敗走被擒伏誅

庫德本官分人不知姓氏好戲狎不喜繩檢膂力過人
善擊鞠重熙初為護衛厯宿直官十三年西征以庫德
為先鋒夏人伏兵掩之庫德力戰麾下士多歿乃單騎
突出遇夏王李元昊來圍勢甚急庫德馳射應弦輒仆
躍馬直擊中堅夏兵不能當晡乃還營改興聖宮太保
清寧九年從重元子嚕古亂與扈從兵戰敗而遁追擒

之凌遲而死

薩爾珠孟父房迪里之孫性兇暴清寧中累遷宣徽使
改殿前都點檢首與重元謀亂會帝獵灤河重元恐事
泄與扈從軍倉卒而戰其子尼嚕古既死同黨潰散薩
爾珠適在畋所聞亂刼獵夫以援既至知尼嚕古已死
大悔恨之謂曰我輩惟有死戰胡為若兒戲自取殞滅
今行宮無備乘夜刼之大事可濟若俟明旦彼將有備
安知我衆不携貳一失機會悔何及重元蕭呼都克等

曰今夕但可四面圍之勿令外軍得入彼何能備不從
遲明投杖而走薩爾珠戰死

奚和勒博一名翰字綏蘭奚王特哩之後善騎射趨捷
而勇與其兄必埒哩齊名大安中車駕幸中京補護衛
稍遷鐵鷄軍詳袞天慶間徙北女直詳袞兼知咸州路
兵馬事改東京統軍既而諸蕃入寇悉破之遷奚六部
大王兼總知東路兵馬事保大二年金兵至天祚播遷
和勒博率吏民立秦晉國王淳為帝淳偽署和哩布知

北院樞密事兼諸軍都統屢敗宋兵淳死其妻普賢女攝事明年金兵由居庸闕入和勒博知北院即箭筈山自立號奚國皇帝改元天復設奚漢渤海三樞密院改東西節度使為二王分司建官時奚人已扎罕嘉努等引兵擊附近契丹部落劫掠人畜羣情大駭會和勒博為郭藥師所敗一軍離心其黨耶律阿古齊與其甥伊實巴沁等殺之偽立凡八月

蕭特烈字額圖琿約尼溫汗宮分人乾統中入直宿衛

出為順義軍節度使天慶四年同知咸州路兵馬事五年以行軍敗奪節度使保大元年遷威部節度使及天祚在山西集羣收兵特烈為副統軍聞金兵將至特烈諭士卒以君臣之義死戰于石輦驛金兵不戰特烈伺間欲攻之天祚喜甚召嬪御諸子登高同觀將詫之金兵望日月旗知天祚在其下以勁兵直趨奮擊無敢當者天祚遁走特烈所至招集散亡尋為中軍都統復敗于梯己山天祚決意渡河奔夏從臣切諫不聽人情惶

懼不知所為特烈陰謂耶律烏哲曰事勢如此億兆離心正我輩效節之秋不早為計奈社稷何遂共劫梁王雅里奔西北諸部偽立為帝特烈自為樞密使雅里卒欲擇可立者會耶律烏哲言珠拉才德純備兼興宗之孫衆皆曰可遂僭立焉特烈偽職如故未三旬與珠拉俱為亂兵所殺

論曰遼之秉國鈞握兵柄節制諸部帳非宗室外戚不使豈不以為帝王久長萬世之計哉及夫肆叛逆致亂

亡皆是人也。有國家者可不深戒矣乎。

遼史卷一百十四

遼史卷一百十四考證

奚和勒博傳明年金兵由居庸闕入和勒博自立 按
本紀及續通鑑金兵至居庸及和勒博僭立並保大
三年事傳上文云保大二年此處原文是年二字應
作明年今改正

遼史卷一百十四考證

欽定四庫全書

遼史卷一百十五

元中書右丞相總裁托克托等修

二國外紀第四十五

高麗

高麗自有國以來傳次久近人民土田歷代各有其志
然高麗與遼相為始終二百餘年自太祖皇帝神冊間
高麗遣使進寶劍天贊三年來貢太宗天顯二年來貢

會同二年受晉上尊號冊遣使往報聖宗統和三年秋
七月詔諸道各完戎器以備東征高麗八月以遼澤沮
洳罷師十年以東京留守蕭恒德伐高麗十一年王治
遣朴良柔奉表請罪詔取女直國鴨綠江東數百里地
賜之十二年入貢三月王治遣使請所俘生口詔贖還
之仍遣使撫諭十二月王治進妓樂詔却之十三年治
遣李周楨來貢又進鷹十月遣李知白來貢十一月遣
使冊治為王遣童子十人來學本國語十四年王治表

乞為婚姻許以東京留守駙馬蕭恒德女下嫁之六月
遣使來問起居自是至者無時十五年韓彥敬來納聘
幣駙馬蕭恒德妻越國公主薨十一月治薨其姪誦遣
王同穎來告十二月遣使致祭詔其姪記權知國事十
六年遣使冊誦為王二十年誦遣使賀伐宋之捷七月
來貢本國地里圖二十二年以南伐事詔諭之二十三
年高麗聞與宋和遣使來貢二十六年進龍鬚草席及
賀中京城二十七年承天皇太后崩遣使報以國哀二

十八年誦遣魏守愚等來祭三月使來會葬五月高麗
西京留守康肇弒其主誦擅立誦從兄詢八月聖宗自
將伐高麗報宋遣引進使韓杞宣問詢奉表乞罷師
不許十二月大軍渡鴨綠江康肇拒戰于銅州敗之肇
復出右皮室詳袞耶律達魯擒肇等追奔數十里獲所
棄糧餉鎧仗銅霍貴寧等州皆降詢上表請朝許之禁
軍士俘掠以政事舍人馬保祐為開京留守安州團練
使旺布為副留守太子太師伊林將騎兵一千送保祐

等赴京守將卓思正殺我使者韓喜孫等十人領兵出拒保祐等復還伊林領兵擊之思正遂奔西京圍之五日不克駐蹕于城西佛寺高麗禮部郎中勃海托實來降遣巴雅爾博諾攻開京遇敵于京西敗之詢棄城走遂焚開京至清江而還二十九年正月班師所降諸城復叛至貴德州南峻嶺谷大雨連日霽乃得渡馬馳疲乏甲仗多遺棄次鴨綠江以所俘人分置諸陵廟分賜內戚大臣開泰元年詢遣蔡忠順來乞稱臣如舊詔詢

親朝八月遣田拱之奉表稱病不能朝詔復取六州之地二年耶律資忠使高麗取地未幾還三年資忠復使如前索地五月詔國舅詳袞蕭迪里東京留守耶律托實等造浮梁于鴨綠江城保宣義定遠等州四年命北府宰相劉慎行為都統樞密使耶律世良為副殿前都點檢蕭實喇為都監慎行挈家邊上致緩師期追還之以世良實喇總兵伐高麗五年世良等與高麗戰于郭州西破之六年樞密使蕭和卓為都統漢人行宮都部

署王繼忠為副殿前都點檢蕭實喇為都監進爵蕭和
卓攻興化軍不克師還七年詔東平郡王蕭巴雅爾為
都統蕭實喇為副統東京留守耶律巴格為都監復伐
高麗十二月蕭巴雅爾與戰于茶陀二河之間我軍不
利天雲右皮室二軍沒溺者衆天雲軍詳袞哈里約尼
帳詳袞阿克達客省使卓庫渤海詳袞高清明等皆陣
亡八年詔數巴雅爾討高麗罪釋之賞將校功益封戰
沒將校妻錄其子弟以南皮室有功賜衣服銀絹有差

出金帛賜約囉尼格二奚軍八月遣郎君赫伯舍等率諸部軍會大軍同討高麗詢遣使來乞貢方物九年資忠還以詢降表進釋詢罪太平元年詢薨遣使來報嗣位即遣使冊王欽為王九年賜欽物十一年聖宗崩遣使告哀七月使來慰奠興宗重熙七年來貢十二年三月以加上尊號來賀十三年遣使來貢三十四年三月又來貢十五年入貢八月王欽薨遣使來貢十六年來貢明年又來貢十九年復貢六月遣使來賀伐夏之捷

二十二年入貢二十三年四月王徽請官其子詔加檢校太尉興宗崩道宗即位清寧元年八月遣使報國哀以先帝遺物賜之十一月使來會葬二年三年來貢四年春遣使報太皇太后哀五月使來會葬咸雍七年八年來貢十二月以佛經一藏賜徽九年十年來貢太康二年三月皇太后崩遣使告哀六月使來弔祭四年王徽乞賜鴨綠江以東地不許九年八月王徽薨以徽子三韓國公勲權知國事十二月勲薨大安元年冊勲子

運為國王二年遣使來謝封冊三年來貢四年三月免
歲貢五年六年連貢九年賜王運羊十月運薨子昱遣
使來告即贈壽隆元年來貢十一月王昱病命其子
顯權知國事二月來貢三年三月王昱薨五年王顯乞
封冊六年封顯為三韓國公七年道宗崩天祚即位改
為乾統元年報道宗哀使來慰奠十二月遣使來賀五
年三韓國公顯薨子悞遣使來告八年封悞為三韓國
公贈其父顯為國王十二月遣使來謝九年來貢天慶

二年王侯母薨來告遣使致祭起復三年遣使來謝致祭又來謝起復十年乞兵于高麗以禦金而金人責之至是遼國亡矣

西夏

西夏本魏拓跋氏後其地則赫連國也遠祖思恭唐季受賜姓曰李涉五代至宋世有其地至李繼遷始大據夏銀綏宥靜五州緣境七鎮其東西二十五驛南北十餘驛子德明曉佛書通法律嘗觀太一金鑑訣野戰歌

製番書十二卷又製字若符篆其俗衣白窄衫毳冠冠後垂紅結綬自號威明設官分文武其冠用金縷貼間起雲銀紙帖緋衣金塗銀帶佩蹠蹠解錐短刀弓矢穿靴禿髮耳重環紫旋襪六襲出入乘馬張青蓋以二旗前引從者百餘騎民庶衣青綠革樂之五音為一音裁禮之九拜為三拜凡出兵先卜有四一灸博焦以艾灼羊髀骨二擗算擗竹于地以求數若揲著然三呪羊其夜牽羊焚香禱之又焚穀火于野次晨屠羊腸胃通則

吉羊心有血則敗四矢擊絃聽其聲知勝負及敵至之期病者不用醫藥召巫者送鬼西夏語以巫為斯也或遷他室謂之閃病喜報仇有喪則不伐人負甲葉於背識之仇解用鷄猪犬血和酒貯於髑髏中飲之乃誓曰若復報仇穀麥不收男女禿癩六畜死蛇入帳有力小不能復仇者集壯婦享以牛羊酒食趨讎家縱火焚其廬舍俗曰敵女兵不祥輒避去訴于官官擇舌辨氣直之人為和斷官聽其屈直殺人者納命價錢百二十千

土產大麥菰豆青稞床子古子蔓鹹地蓬實薇蓉苗小
蕪荑席雞草子地黃葉登廂草沙葱野韭拒灰蓀白蒿
鹹地松實民年十五為丁有二丁者取一為正軍負擔
雜使一人為抄四丁為兩抄餘人得射它丁皆習戰正
軍馬馳各一每家自買一帳團練使以上帳弓各一箭
五百馬一索馳一旗鼓五槍劍棍梃抄袋雨氈渾脫鍬
矟箭牌鐵箠篋各一刺史以下人各一駝箭三百毛幕
一餘兵三人共一幕有礮手二百人號伯奇勇健者號

撞令郎齋糧不過一旬晝則舉煙揚塵夜則篝火為候若獲人馬射之號曰殺鬼招魂或射草縛人出軍用單日避晦日多立虛寨設伏兵衣重甲乘善馬以鐵騎為前鋒用鈎索絞聯雖死馬上不落其民俗勇悍衣冠騎乘土產品物子姓傳國亦畧知其大概耳初西夏臣宋有年賜姓曰趙迨遼聖宗統和四年繼遷叛宋始來附遼授特進檢校太師都督夏州諸軍事遂復姓李十月遣使來貢六年入貢七年來貢以王子帳耶律襄之女封義成公主下嫁

繼遷八年正月來謝三月又來貢九月繼遷遣使獻
宋俘十月以敗宋軍來告十二月下宋麟廊等州來
告遣使封繼遷為夏國王九年二月遣使告伐宋之
捷四月遣李知白來謝封冊七月復銀綏二州來告
十月繼遷以宋所授敕命遣使來上是月定難軍節
度使李繼捧來附授開府儀同三司檢校太師兼侍
中封西平王仍賜推忠效順啟聖定難功臣十二月
繼遷潛附于宋遣韓德威持詔諭之十年二月韓德威

還奏繼遷託故不出至靈州俘掠以還西夏遣使來奏
德威俘掠賜詔撫諭十月來貢十二年入貢十三年敗
宋師遣使來告十四年又來貢十五年三月以破宋兵
來告封繼遷為西平王六月遣使來謝封冊十六年來
貢十八年授繼遷子德明朔方軍節度使十九年遣李
文冀來貢六月奏下宋恒環慶三州賜詔褒美二十年
遣使來進馬駝六月遣劉仁勗來告下靈州二十一年
繼遷薨其子德昭遣使來告六月贈繼遷尚書令遣西

上閤門使丁振弔慰八月德昭遣使來謝弔贈二十二年三月德昭遣使上繼遷遺留物七月封德昭為西平王十月遣使來謝封冊二十三年下宋青城來告二十五年德昭母薨遣使弔祭起復二十七年承天皇后崩遣使報哀于夏二十八年遣使冊德昭為夏國王開泰元年德昭遣使進良馬二年遣引進使李延弘賜夏國王李德昭及義成公主車馬太平元年來貢十一年聖宗崩報哀于夏德昭遣使來進賻幣興宗即位以興

平公主下嫁李元昊以元昊為駙馬都尉重熙元年夏
國遣使來賀李德昭薨冊其子夏國公元昊為王二年
來貢十二月禁夏國使沿路私市金鐵七年來貢李元
昊與興平公主不諧公主薨遣北院承旨耶律庶成持
詔問之九年宋遣郭禎以伐夏來報十年夏國獻所俘
宋將及生口十一年遣使問宋興師伐夏之由十二月
禁托歡鬻馬于夏沿邊築障塞以防之十二年正月遣
樞密都承旨王惟吉諭夏國與宋和二月元昊以加上

尊號遣使來賀耶律迪里等使夏國還奏元昊罷兵遣使報宋四月夏國遣使進馬駝七月元昊上表請伐宋不從十月夏人侵党項遣延昌宮使高嘉努讓之十三年四月党項及山西節度使庫哩以五部叛入西夏詔徵諸道兵討之六月準布子烏巴執元昊八月夏使對不以情羈之使復來詢事宜不實對答之十月元昊上表請罪欲收集叛黨以獻從之進方物命北院樞密副使蕭格逐之元昊率党項三部來降詰其納叛背盟

元昊伏罪初夏人執蕭呼都克至是請以被執者來歸
詔所留夏使亦還國十二月呼都克來歸又遣使來貢
十七年元昊薨其子諒祚遣使來告上其父遺留物圖
伯特國乞以本部軍助攻夏國不許十八年復議伐夏
留其賀正使不遣遣北院樞密副使蕭惟信以伐夏告
宋六月夏國遣使來貢留之七月親征八月渡河夏人
遁九月蕭惠為夏人所敗十月招討使耶律特里袞率
準布軍至賀蘭山獲元昊妻及官屬遇其軍三千來拒

殪之詳。衮蕭慈實努南剋耶律幹里。歿于陣。十九年正月。遣使問罪于夏。夏將旺布等攻金肅城。耶律高嘉努等破之。旺布被創遁。殺威赫伊特。凌結。三月。殿前都點檢蕭塔喇台與夏軍戰于三角川。敗之。招討使蕭博諾北院大王宜新等帥師伐夏都。部署布古德為監戰。五月。蕭博諾等入夏境。不遇敵。縱軍俘掠而還。夏國旺布來降。十月。李諒祚母遣使乞依舊稱臣。十二月。諒祚上表如母訓。二十年二月。遣使索党項叛戶。五月。蕭約噶

使夏回進諒祚母表乞代党項權進馬駝牛羊等物又
求唐隆鎮仍乞罷所建城邑以詔答之六月獲元昊妻
及俘列夏人置于蘓州二十一年十月諒祚遣使乞弛
邊備遣約噶賫詔諭之二十二年七月諒祚進降表遣
林牙高嘉努賫詔撫諭二十三年正月貢方物五月乞
進馬駝詔歲貢之七月諒祚遣使求婚十月進誓表興
宗崩遣使報哀于夏二十四年道宗即位清寧元年遣
使來貢九月以先帝遺物賜夏四年四月遣使會葬九

年正月禁民鬻銅于夏咸雍元年五月來貢三年十一月遣使進回鶻僧金佛梵覺經十二月諒祚薨四年二月諒祚子秉常遣報哀即遣使弔祭秉常上其父遺物十月冊秉常為夏國王十二月來貢五年七月遣使來謝封冊十一月秉常乞賜印綬九年遣使來貢太康二年正月仁懿皇后崩遣使報哀于夏以皇太后遺物賜之遣使來弔祭五年來貢八年二月遣使以所獲宋將張天益來獻大安元年十月秉常遣使報其母哀二

年十月秉常薨遣使詔其子乾順知國事十二月李乾順遣使上其父秉常遺物四年七月冊乾順為夏國王五年六月遣使來謝封冊八年六月夏為宋所侵遣使乞援壽隆三年六月以宋人置壁壘于要地遣使來告四年六月求援十一月遣樞密直學士耶律儼使宋諷與夏和夏復遣使求援五年正月乾順伐布木喇實等部十一月夏以宋人罷兵遣使來謝六年十一月遣使請尚公主七年道宗崩遣使告哀于夏遣使來慰奠天

祚即位乾統元年夏遣使來賀二年復請尚公主又以
為宋所侵遣李造福田若水來求援三年復遣使請尚
公主十月使復來求援四年五年李造福等至乞援以
族女南仙封成安公主下嫁乾順六年正月遣牛溫舒
使宋令歸所侵夏地六月遣李造福來謝八年乾順以
成安公主生子遣使來告九年以宋不歸地來告十年
遣李造福等來貢天慶三年六月來貢保大二年天祚
播遷乾順率兵來援為金師所敗三年乾順請臨其國

六月遣使冊乾順為夏國皇帝而天祚被執歸金矣
論曰高麗西夏之事遼雖嘗請昏下嫁烏足以得其固
遠哉主韓擬壤反復易知涼州負遠納叛侵疆乘隙輒
勸貢使方往事覺隨生興師問罪屢煩親征取勝固多
敗亦貽悔惜吳趙咨對魏之言也大國有征伐之兵小
國有備禦之固豈其然乎先王柔遠以德而不以力尚
矣遼王求援二國雖能出師豈金敵哉

遼史卷一百十五

遼史卷一百十五考證

高麗傳自太祖皇帝神冊間高麗遣使進寶劍 按遼
太祖本紀高麗進寶劍在九年是時尚未建元九年
之明年始稱神冊元年此似紀年之誤

聖宗統和十二年入貢 原文訛十三年今據聖宗本
紀改

開泰四年命北府宰相劉慎行為都統 劉慎行按聖
宗紀作劉晟

咸雍七年 原文無咸雍二字按道宋本紀清寧間俱不紀高麗入貢至咸雍七年始來貢八年又入貢賜以佛經一藏據此則為咸雍無疑也

太康九年八月王徽薨 按宋史及通考王徽卒子勲嗣百日卒弟運嗣四年卒子堯嗣未幾卒世叔父熙嗣避遼諱改名顯顯卒子侯嗣是王運非勲子運子昱又名堯顯非昱子顯初名熙也紀內所載多與二書不合

西夏傳每家自置一帳團練使以上帳弓各一箭五百
馬一 原文每家自置一家於義無解據宋史一家
號一帳則下家字為帳字之誤又原文張弓矢各一
馬五百匹按宋史張作帳箭五百馬一今並據宋史
改正

統和九年遣知白來謝封冊 李知白按聖宗本紀作
杜白又高麗紀統和十三年遣李知白來貢二國使
臣同名而此處又與本紀互異

定難軍節度使李繼捧來附 按繼捧未嘗附契丹蓋

繼遷之誤

繼遷子德明 按宋史夏國傳繼遷子德明未嘗改名
德昭遼史前稱繼遷子德明後連云德昭應係傳寫
之訛

重熙十三年六月準布子烏巴執元昊 按興宗紀李
元昊來援叛黨準布長烏巴執元昊遣使來援韓里
噶拉來與傳云執昊互異

原書中縫卷次批誤

招討使耶律迪魯固

按興宗紀作敵魯古此又作敵

古今畫一改

遼史卷一百十五考證